

FJALA E DEPUTETIT VULLNET SINAJ

E ENJTE DATA 08 QERSHOR 2023

E nderuar zonja drejtuese e seancës,

Të nderuar kolegë,

Të dashur qytetarë,

Dua të sqaroj se projektligji “Për taksat kombëtare”, të cilin po e diskutojmë sot në parlament, fillimisht ka ardhur në Komisionin e Ekonomisë si propozim i Këshillit të Ministrave, i cili synonte heqjen e taksës për produktin e hirrës së qumështit dhe taksën për kremin e qumështit. Në fakt, sot në diskutim do të kemi këtë projektligj, por edhe një amendim të bërë nga ne si anëtarë të Komisionit të Ekonomisë. Të bëjmë pak histori. Taksimi për produktet e hirrës së qumështit dhe për kremin e qumështit u vendos në vitin 2021 si pjesë e paketës fiskale të vitit 2022, kur për hirrën e qumështit u vendos taksa në nivelin 150 lekë për kilogram. Ky parashikim për taksimin e hirrës së qumështit dhe të kremit kishte si qëllim nxitjen e prodhimit vendas të qumështit natyral dhe mbështetjen e fermerëve vendas. Ndërsa fabrikat e prodhimit të qumështit dhe nënprodukteve të tij u përjashtuan nga kjo taksë, fabrikat e produkteve ushqimore të ambalazuara që prodhojnë kroasantë, biskota e të tjera, të cilat kanë në bazën e tyre këto lëndë të para, nuk u përjashtuan. Kjo është arsyeja e propozimit nga Këshilli i Ministrave për heqjen e këtyre dy taksave, i cili erdhi si rezultat i shqetësimit të ngritur nga këto kompani, të cilat për prodhimin e këtyre produkteve përdorin si lëndë të parë hirrën e qumështit dhe kremin e qumështit. Taksimi sillte rritjen e kostove të këtyre produkteve dhe krijonte probleme në eksportet e këtyre produkteve në treg. Komisioni për Ekonominë dhe Financat në mbledhjen e zhvilluar në datën 24 janar 2023 e mori në shqyrtim dhe e miratoi këtë projektligj për t’u ardhur në ndihmë kompanive eksportuese të këtyre produkteve ushqimore, pra e hoqi taksën për hirrën dhe për kremin e qumështit. Nisur nga informacioni i marrë në media, një grup fermerësh, përfaqësues të prodhuesve më të mëdhenj të qumështit, kërkuan një takim urgjent me Komisionin e Ekonomisë dhe Financave. Gjatë këtij takimi fermerët ngritën shqetësimin se heqja e taksës së hirrës së qumështit dhe e kremit të qumështit, do të bënte që të rritej në mënyrë të pakontrolluar përdorimi i këtyre produkteve në prodhimet e bulmetit. Kjo do të sillte rënien e kërkesës për qumështin natyral të prodhuar nga fermerët, rrjedhimisht do të ulej çmimi i qumështit në fermat tona.

Komisioni i Ekonomisë i dha rëndësinë e duhur. Prandaj dua ta falënderoj kryetarin e komisionit që këmbënguli për ta çuar deri në fund zgjidhjen e problemit të fermerëve dhe në muajin shkurt të këtij viti organizoi një takim të përbashkët ndërmjet fermerëve, prodhuesve të nënprodukteve të qumështit, që janë fabrikat e qumështit, Ministrisë së Bujqësisë dhe Ministrisë së Financave. Pasi u bë një ballafaqim midis fermerëve dhe prodhuesve të nënprodukteve të qumështit që ishin fabrikat, duke u dakordësuar me Ministrinë e Financave dhe Ministrinë e Bujqësisë, u vendos për të bërë një amendim të projektligjit për t’u dhënë zgjidhje të gjitha shqetësimeve të grupeve të interesit, njëkohësisht, duke ruajtur interesin e konsumatorëve në treg për cilësinë dhe për rritjen e çmimit. Në muajin prill, unë dhe një grup deputetësh, anëtarë të Komisionit të Ekonomisë, kemi paraqitur një

amendament këtu në seancë, i cili propozon lënien e taksës së importit për prodhimin e hirrës dhe për kremin e qumështit, duke i dhënë zgjidhje shqetësimit të fermerëve, njëkohësisht, për t'i dhënë zgjidhje edhe shqetësimit të bizneseve, të cilat prodhojnë produkte të ambalazuara, si: kroasantë, biskota, panetone, ëmbëlsira e të tjera. Për bizneset e tjera që prodhojnë nënprodukte të qumështit, të cilat janë fabrikat e qumështit, kemi propozuar që të përjashtohen nga taksimi vetëm subjektet e prodhimit të produkteve ushqimore të ambalazuara, si dhe subjektet e përpunimit të qumështit dhe nënprodukteve të tij, të cilat kanë në përbërje të tyre qumësht pluhur, hirrë qumështi dhe krem qumështi, pra për sasinë që është miratuar nga AKU-ja në kartën teknologjike të produkteve. Gjithashtu, në amendamentin e paraqitur subjektet e përpunimit dhe prodhimit të këtyre produkteve do të detyrohen të paguajnë të gjithë vlerën e taksës për secilën sasi të këtyre lëndëve të importuara, të cilat nuk figurojnë se janë përdorur për prodhimin e këtyre produkteve, në bazë të kartës teknologjike të miratuar nga Autoriteti Kombëtar i Ushqimit. Në të njëjtën kohë, kemi parashikuar në amendim kontrollin periodik nga Ministria e Financave në kompanitë që përpunojnë qumështin dhe që prodhojnë produkte ushqimore të paketuara, ashtu edhe në dogana për sasinë të importuara, duke mos lejuar që të hyjnë këto produkte në sasi dhe të përdoren për produkte, të cilat nuk kanë vlerat e caktuara ushqimore në treg. Duke qenë se me anë të këtij amendamenti i jepet zgjidhje shqetësimit të fermerëve, shqetësimit të bizneseve prodhuese dhe mbrohet konsumatori si për cilësinë e produktit, edhe për çmimin në treg, duhet që amendimin në ligjin "Për taksat kombëtare" ta miratojmë të gjithë së bashku. Faleminderit!